

Paur kute Ximoximã atãri pi'ôk no'ôk ne ja.

Paur ne ajte Ximoximã pi'ôk no'ôk ne. Krĩraxbê Rômakam ne me Paurbê ijê nhym mekbê ijê djâkam dja. Nãm amijamãro dja. Me kute bĩnmã amijamãro dja. Ne kam krabê Ximoximã pi'ôk no'ôk ne. Jejukôt ne Paur Ximoxio kra. Nhym Ximoxi krĩraxbê Epexukam djan memã Metĩndjwỳnh kabẽn'ã ujarẽnho dja. Nhym Paur mete bĩn kutã kum pi'ôk no'ôk ne kum,

—Arỳm ityk 'ỳr. Arỳm ne ba amijo rãm ne ja. Gop arek memã Metĩndjwỳnh kabẽno amirĩto aku'ê. Ba ije amã arẽnha dja ga amũ idj'ã memã arẽ. Gora atỳx ne, ane. Ne ajte kum,

—Amrẽ Rôma'ỳr tẽn ipumũ, ane. Nãm ã Paur Ximoximã ane. Paur kute kum tỳx jadjàr nhym Ximoxi tỳx ne katàt kute memã Metĩndjwỳnh'ã ujarẽn ne kute memã Metĩndjwỳnh kabẽn jarẽnhmã. Nhym me 'êx ne kute amijo Jeju nhô me jao ba djwỳnhja ne me Metĩndjwỳnh kabẽn kupa'ã ar memã arẽnho ba. Nhym bep Ximoxi gêdja katàt memã arẽ. Kadjy ne Paur kum pi'ôk no'ôk ne ano.

1 ¹⁻²Akmere Ximoxi, ba ibê Paur ne ba amã pi'ôk no'ôk ne. Imã akĩ:nhkumrêx, akmere, ba kam ajo ikra. Ba ibê Paur, ibê Jeju Kritu nhô àpênh ne ba amã pi'ôk no'ôk ne. Metĩndjwỳnh ta ne imã arẽn ijano, ije memã arẽnhmã ijano. Metĩndjwỳnh ne arỳm me bamã kabẽn pydjĩn arẽ, me baje arỳm amim Kritu Jeju markumrêxkam ne kute me bajo tĩnmã me bamã kabẽn pydjĩn arẽ, gu me batĩn rã'ã rã'ãmã. Ba kam ô'ã memã arẽnho tẽ.

Gê Metĩndjwỳnh ajo djuw mex. Kritu Jeju gu banhô Bẽnjadjwỳrmẽ Bãmbê Metĩndjwỳnh ar ukapřĩkôt ajo djuw mex ne ar ajo ba. Gê arkum akapřĩ ne amã umar mex jarẽ, ga kam adjumar mex ne ar aba.

³Ê, nã bãm aman kam mã Metĩndjwỳnhmã amikĩnh jarẽ. Metĩndjwỳnh ta, kumã ne ba amikĩnh jarẽn kum ajarẽ. Kumã ne ba idjàpênh. Ije amikam ijaxwe 'ô mar kêt ne kum idjàpênh iba. Me bakukãmãre ne ã Metĩndjwỳnhmã àpênh ar bao ane ba kam badjwỳ ã kum idjàpênh ar ibao ane.

⁴Abenbê gu babikjêr kutã amỳrkam ije amar rã'ã. Akamàtkammẽ a'urimẽ ba aman kam te ije apumũnh prãme. Dja ba apumũn kam arỳm ikĩnhkumrêx ne. ⁵Ba ije prĩne amar. Ga ne ga aje akabẽno aben nhikjê kêt ne tu amim Jeju markumrêx ba arỳm ama. Akwatynh Roxdjimẽ anã

Juniximẽ ne ar ã akajmãtã amim Jeju kamnhĩxo ane. Ga kam gadjwỳ ar kôpdji'ã tu amikajmã'ã Jeju markumrẽx. Ba kam arỳm amã ikator mex ne.

Tu kum me uma kêt mã 'ã karõ.

⁶Kam ne ba ije amã ikabẽn jarẽnhmã. Aje amimar kadjy ne ba akubyn amã arẽ. Ë, ije ajã aminhikra djirkam Metĩndjwỳnh kute amã mỳjja rerja dja ga tu markumrẽx ne ar o aban on ajte atỳx ne kum adjãpẽn tỳx ne. Tu amã me uma kêt ne memã Jeju jarẽ. ⁷Djãm me batĩn prãm ne ar babamã got Metĩndjwỳnh me bawỳr ta Karõ jano. Arkati, me batỳx ne ar baban bamã aben jabẽn baje amipnẽn ne ar babamã. Nãm ã Metĩndjwỳnh Karõ me bajo ane.

⁸Kam dja ga apijãm kêt ne tu memã Jeju'ã ajarẽn ajte badjwỳ ikam apijãm kêt ne. Nã bãm Kritu'ã idjujarẽn ny jarẽnho tẽ nhym me mekbê ijẽ djakam imẽ. Kam dja ga ikam apijãm kêt ne. Nhym bep kati, dja ga tu atỳx ne memã Jeju'ã ajarẽ nhym me kum Jeju kurêkam kôt kum akurẽn akam ngryk ne ajo ajkẽ ga kam ikudjwa atokry. Kwãrĩk wãnh rã'ã Metĩndjwỳnh dja on amã tỳx jadã, atokry katikôt amã tỳx jadã ga kam atỳx ne ar aba.

⁹Nã, Metĩndjwỳnh ta, kute me bapytãr djwỳnh dja amã tỳx jadã. Nãm me bapytãn amiwỳr me bajuw, me bamextire ne ar baba kadjy ne amiwỳr me bajuw. Mã ne gu me nẽ nhym Metĩndjwỳnh kôt me bapytã? Djãm me bamex ne ar babakôt ne me bapytã? Arkati, ta ne tu me bajã amim karõ, ukapĩkôt ne tu me bajã amim karõn kam amiwỳr me bajuwn me bapytã. Me baje tu amim Kritu Jeju markumrẽxkam me bapytã. Amrêbê:, kute pyka nhipêx kêtĩr ne Metĩndjwỳnh ukapĩkôt me bajã amim karõ, Jeju Kritu kute me bapytãrmã ne amim me bajã karõ. ¹⁰Amrêbê ne me bajã amim karõn kam ajbir me bamã o amirĩt. Kritu Jeju, me bapytãr djwỳnh arỳm me bawỳr tẽn bõx ne me bamã Metĩndjwỳnh djukapĩrõ amirĩt. Arỳm ne bõx ne me bamã me batyko apêx gu me tu batĩnkumrẽx, me batyk nhjukri batĩn rã'ã:n amũ ijukri batyk kêtumrẽx ne. Be, Metĩndjwỳnh ukapĩja pumũ. Nhym me Jeju'ã gwaj badjujarẽn nykôt arỳm kuma.

¹¹Kam ne Metĩndjwỳnh ijano. Kum idjãpẽn ne me kunĩmã kãj bê Jeju'ã idjujarẽnhmã ijano ba tẽ. Ije me kunĩmã kukrãdjã ny jarẽn nhym me kute marmã. Kadjy ne ijano ba tẽ. ¹²Nã bãm tẽn memã arẽ nhym me kam ijo ajkẽ. Jeju'ã idjujarẽnhkôt ijo ajkẽ ba itokry. Djã nã bãm kam ipijãm? Arkati, arỳm ne ba tu amim Jeju kamnhĩxkumrẽx ne kam arỳm prĩne amim àtari. Gêdja prĩne ije Jejumã amikangakam prĩne ijo djuw mex ne ijãno dja. Ne ijãno ãm rã'ã: nhym õ akati arỳm 'ỳr bõx nhym akubyn me bawỳr bõx. Tãm ne ba mar tỳx ne amijã kamnhĩx ne.

¹³Gora ije amã katãt ikabẽn jarẽnha amijamakrekam anhôn 'ãno djan ikôpdji'ã kôt ar amijo aba. Ne aje arỳm amikajmã'ã Kritu Jeju marja 'ãno djan kôt tu amã me kunĩ jabê ne. ¹⁴Ë, Metĩndjwỳnh kute katãt memã kabẽn jarẽnha ga aje kôt ar amijo abaja gora mã kôt ar amijo aba rã'ã. Nhym Metĩndjwỳnh Karõ kute me bakam krĩja dja ajo tỳx ga kam kôt ar amijo aba.

¹⁵Pykabê Adjikkam me kunĩ ne me ikangan mō, me umaje mō ga arỳm ama. Nhyim Pijerumẽ Emodjedjwỳ mekõt ikanga.

¹⁶Nhyim bep ate ne Nexipôr. Tãm ne imã kĩnh jadjàr mexkumrẽx. Ne ajte imã kĩnh jadjà. Nãm imã kĩnh jangjẽnh krãptĩ ne. Me kute ibê ijẽkam pijãm kêt ne. Kum me uma kêt ne. Gê pãnh Bẽnjadjwỳr Jeju kum kaprĩ. Kum Nexipôrme òbikwa kunĩ ar kaprĩ. ¹⁷Nãm krĩraxbê Rômakam ajbir bõx ne prĩ:ne ijabej. Ijabej tẽn ijabej tẽn ijabej tẽn kam imã kato. ¹⁸Amrẽbê krĩraxbê Epexukamdjwỳ ikõt àpẽnha ga arỳm aje mar mex. Nãm apỳnh mỳjja kupẽn o ikõt kangõ. Gê Bẽnjadjwỳr Jeju kum kaprĩ, Bẽnjadjwỳr akubyn bõxkam kum kaprĩ. Tãm ne ja.

Am tỳx ne rerek kêtma kute arẽnh.

2 ¹Be, akmere Ximoxi, gora atỳx. Kritu Jeju ta ukaprĩkõt dja ajo djuw mex ne ajo tỳx ga kam atỳx ne ar aba. ²Ê, gop ikabẽn ma. Ba ije me ipôkri memã ikabẽn jarẽnh nhyim me krãptĩ kute mar ga gadjwỳ aje marja tãm dja ga amidjô'ã me kwỳmã arẽ. Me mrãmri kabẽnkumrẽxmã dja ga arẽ. Me kute amim Jeju mar 'ãno ãmmãbit dja ga arẽ nhyim kam me akôpdjĩ'ã amũ aben nhijuk'ã memã arẽnh tẽ.

³Ê, me krãkamngõnhreja pumũn me'ã amijakre. Dja ga abê krãkamngõnh prãbê te atokryn mã Kritu Jejukõt ajkamẽ. ⁴Ê, me krãkamngõnhre ba kutã kute amijangri tỳx ne kute tu mỳjja mar kêt ne mũm mrãnhbit kute marja pumũ. Jabit ne me kute mar ne ba. Me kute atemã mỳjja kajgo mar kêt ne tu ba, me ò bẽnjadjwỳr kute memã kabẽn mex jarẽnh ne mekam kĩnh kadjy. Gadjwỳ dja ga ã amijo anhỹr ar o aban anhõ Bẽnjadjwỳr Jeju Kritu kabẽnkõt amrãnhbit aje mar nhyim kõt kute apumũnh ne akam kĩnh kadjy.

⁵Ê, dja ga me kute aben rerdjwỳ pumũn me'ã amijakre. Gadjwỳ dja ga ã anen Kritu Jeju kukràdjãkõtbit ar amijo aba. Me kute aben rerkam dja me mrãnh tỳx'õ pydjĩn me bakukràdjã tũmkõt me kure. Nhyim kam me kumãbit kĩnh djã ngã. Be, gadjwỳ dja ga ã anen Kritu Jeju kukràdjãkõtbit ar amijo aban kam kàjkwamã 'ỹr bõx.

⁶Ê, dja ga ajte me ò pur djwỳnh kam àpẽn rax pumũn me'ã amijakre. Nãm me ò pur djwỳnh amim pur jadjuwn arỳm kam djwỳ kre nhyim arỳm abatàn ne. Nhyim me ò pur djwỳnh kumrẽx kam djwỳ krẽn arỳm kĩnh ne. Dja ga 'ã amijakren adjapẽn rax ne. Nhyim kam Metĩndjwỳnh amã o pãnh ne. ⁷Ê, dja ga ikabẽnja mar ar o aba. Nhyim kam tũmrãm dja Bẽnjadjwỳr djwỳnh arỳm ano bõ ga kam arỳm mỳjja kunĩ ma.

⁸Ê, Jeju Kritu dja ga omũ. Bẽnjadjwỳr raxbê Dawi tãmdjwỳ 'õ. Ga tyk ne akubyn tĩn ne katorja pumũ. Kukràdjã ny'ã ne ba ar idjujarẽn ibaja, ⁹Jeju kukràdjã ny'ã ar idjujarẽn ibakõt ne me kum ikurẽn ijo ajkẽ ba itokry ga me kute idjuwpreja pumũ. Nãm me ijo ijaxwen idjuwpre ba nõ. Ê, djã nãm me idjuwpren o mebê Metĩndjwỳnh kabẽnbe aptã? Kati, dja me 'ã ujarẽn tẽn rã'ã ne amũ abendjô'ã pyka kunĩkõt abenmã arẽ. ¹⁰Kam ne ba te itokryn Metĩndjwỳnh 'ãno djan tu ate ikrã. Mỳj kadjy? Bir, Metĩndjwỳnh nhõ me ja kadjy, Metĩndjwỳnh kute amijo

me utàrja kadjy. Me jadjwỳ Kritu Jeju kute me utàr nhym me kôt ò kàjkwa mextirekam ar ba rà'ã: rà'ãmã. Ò kàjkwa mextire, kam mỳjja punu kêt, prĩne mexo kute pykabê mỳjja ja jakrenh, ò kàjkwa mextire jakam me ar ba rà'ã rà'ãmã. Kam ne ba te itokryja. Me jadjwỳ kute amim Jeju mar nhym kute me utàrmã.

¹¹ Mrãmri ne me abenmã,

—Dja gu me Jejukôt batyk jabej kôt ajte batĩn.

¹² —Dja me te me bajo ajkê gu me te batokryn mã Jeju 'ãno djan kam pãnh batyk nhijukri akubyn batĩn ne babênjadjwỳr ne ar meo baba.

—Dja gu me amikatin jãm Jejubê bakrã nhym adjwỳnhdjwỳ me babê amikatin jãm me babê krã.

¹³ —Dja gu me amrêbê baje amijo Jeju pytarkam me krãptĩjakôt bajaxwe nhym kam Jeju dja me bamar rà'ã ne. Me ba dja gu me amibê kanga nhym bep ta gêdja me bamar rà'ã ne, me bakanga kêt ne. Mỳkam?

Bir, ta ne kabênkumrêx. Kabên pydji ne me bakadjy arê. Gêdja atemã ajte amibê kabên 'ò jarênh kêt ne. Kam dja amibê me bakanga kêt ne. Ë, mrãmri ne me ã abenmã kabênwã jarênho ane.

Kute memã Metĩndjwỳnh kabên jarênhmã.

¹⁴ Wãnh dja ga ajte akubyn memã tãm jarê gê me ajte kuma. Ne ajte memã kum, —Ë, kwãrik wãnh me akabên kukràdjã mỳr jabej abenmã adjàkrê kêt ne akabêno aben japanh kêt, ane. Dja ga memã wã jarê, kàj bê memã akabên jarê. Metĩndjwỳnh kute akabên mar ne akôt kabênkam memã akabên jarê gê me kuma. Djã nãm me ari abenã atom bakam mex got? Kati, nãm me mỳjja man nhỹnh kabên ja'ò mỳr jabej ajmãn ar abeno bikênho o ba.

¹⁵ Ë, gora Metĩndjwỳnhmã adjàpênhkam atỳx. Prĩne katàt Metĩndjwỳnh kabên'ã memã adjujarênh ar aban memã arê. Metĩndjwỳnh kabên ne katàt. Kam dja ga katàt memã 'ã ajarê. Metĩndjwỳnh akam kĩnh ne kute amã,

—Amexkumrêx. Ba akam ikĩnhkumrêx, anhyr kadjy. Kadjy dja ga adjàpênhkam atỳx ne kam amikam apijãm kêt ne.

¹⁶ Kwãrik wãnh me kabên kajgo kwãrik wãnh nõ. Me kabêno kute aben japanh kwãrik wãnh nõ. Rũm kum akàx. Wã, me kabên wão dja me Metĩndjwỳnhbê amiptâr mex ne. Kubê o amiptâro mון o mון o mון i kubê o amiptâr mex ne arỳm o amipunu mex ne. ¹⁷ Me kabên punu wã kute wajre pyrãk. Ga wajre kute amũ me i kuro baja pumũ. Nhym me ujarênh punuja ã prĩne meo bikênho ane. Me ja 'ò nhidjibê ne Imene. 'Òdjwỳ ne Pireto.

¹⁸ Nãm ar amibê Metĩndjwỳnh kabên kanga, Metĩndjwỳnh kute katàt memã kabên jarênh ja kangan kabên punuo amũ Jeju nêje meo akêxo tẽn memã kum,

—Arỳm apêx. Arỳm Metĩndjwỳnh kute akubyn meo tĩn djã arỳm apêx, ane. Nãm ã ar memã 'êxo anen me kwỳo ajkê, me kute amim Jeju mar kwỳo ajkê.

¹⁹ Nhym bep ate ne Metĩndjwỳnh kabên. Metĩndjwỳnh kabên ne mrãmri kabênkumrêx. Kute kên pyrãk, kên nhỹr tỳxja pyrãk. Nãm me te

kute kên nhikô 'yrmã. Nãm ã Metĩndjwýnh kabẽndjwý ane nhym me te kute kabên nhikô'yrmã. Nhym Metĩndjwýnh kabên ne memã kum,

—Bẽnjadjwýr djwýnh ne ta ô me ja prĩne arým me àtãri ne prĩne arým mekam ama, ane. Ne ajte,

—Gora gê me kute “Ije Bẽnjadjwýr Jeju mar” anhýrja me on mýjja punu kanga, ane. Nãm ã Metĩndjwýnh kabên'a pi'ók no'ók ane. Nhýnh ne me'ô ne kute kabên nhikô'yrmã.

²⁰Ê, me'ô bẽnjadjwýr nhũrkwãkam ne ngônh apýnh kute abeno djãri kumex. Kwý ne adjênh nhym bep kwý ne kajgo. Mexja ne kên karýro ipêx ne kwý kryt jakao ipêx. Nhym bep kajgoja ne ngôkraxmẽ ngyo ipêx. Tãm ne mýjja kajgo kadjy. Nhym bep mexja ne mýjja mex kadjybit.

²¹Nhym me prĩne ngônh ku'ô nhym kam akan kam mexkumrêx, mýjja mexkumrêx kadjybit ku'ê. Be, gu me badjwý ngônh'a amijakren prĩne amijaxwe, mýjja punu kangan kam bamexkumrêx, mýjja mex kadjybit bamextire. Nhym kam me banhô Bẽnjadjwýr dja arým amim me bapumjuw, kum me badjãpênh kadjybit amim me bapumjuw. Gu me kam apýnh badjãpênh djãri badjãpênho baku'ê.

²²Nãm me abatãnh nyre kum mýjja punu prãmkuumrêx. Rũm kum akãx ne kubê amiptã. Gê arĩk wãnh me kute mýjja punuo bawã arĩk wãnh memã nõ. Nhym bep kati, ga dja ga katãt amrãnh'a anopdji. Katãt amrãnh ne aje amim Jeju kamnhĩxbê ar aban amã me abên mekam angryk kêt ne adjumar mex ne ar aba, be, mýjja ja dja ga 'ãno djan 'ã anopdji ne. Kam gẽdja ga ã amijo anhýro tẽ. Me jamẽ ro'ã ã amijo anhýro tẽ. Me ôkre kadjwýnhbê axwe'ô nõr kêt ne kute Metĩndjwýnhmã amijo à'wýrjamẽ ro'ã dja ga ã amijo anhýr o tẽ. Nhym arĩk wãnh mýjja punuwã wãm nõ.

²³Kwãrĩk wãnh me kute abenã atomwã kwãrĩk wãm nõ. Tãm ne kajgokumrêx. Tãm gẽdja wãm nõ. Djãm kôt mete mýjja mar got. Kôt ne me kum aben kurên kam aben japrýn abenmã àkrê.

²⁴Bep kati, ga abê Bẽnjadjwýr djwýnh nhô àpênhkam kwãrĩk wãnh akabẽno me apanh kêt. Bẽnjadjwýr nhô àpênh ne me me kunĩkam ukapĩ ne prĩne memã Metĩndjwýnh kabên'a ujarênh mex ne, ngyrk kêt ne memã 'ã ajarẽ. Nãm ã Bẽnjadjwýr nhô àpênh ã meo ane.

²⁵Abê Bẽnjadjwýr nhô àpênhkam dja ga ã o anen kam akrãnmã akurê djwýnhmã akabên ne tu kum akabên mex jarẽ. Birãm Metĩndjwýnh dja amikadjy me ja ngrêk nhym me arým amikam ajkam aman wãnh axwemã iren 'ýr amijo akêx ne arým Metĩndjwýnh kute katãt memã kabên ja arým kum kato. ²⁶Arým Metĩndjwýnh kute katãt memã kabên jarênh ja man arým amim kato. Xatanaj ne me ja pa 'amýn amiwýr meo môn ar meo ba nhym me kam ar kum àpênh ba. Birãm Metĩndjwýnh dja amikadjy akabẽno me ngrêk nhym me arým amim katon Xatanaj kangan kubê amiptãn arým jãm Jejuo amijakre. Kadjy ne ba amã,

—Akrãnmã memã akabên jarẽ, ane.

Pyka kute o ino rer 'ÿr me axwe raxmã kute arênh.

Xim k 4.1; Djuda 18

3 ¹Ë, prïne ikabên ma. Adjÿm, dja ï me umar punu djà kato. Pyka kute o ino rer 'ÿrkam dja ï me umar punu djà kato. Mÿkam dja me umar punu? Bir, me axwe raxkam. Ije, mã ne me kukràdjà kute?

Je kum dja ï me apÿnh amijo ba. ²Dja me ôdjÿn kam amidjwÿnhbit man memã mÿjja nhôr kêtukumrêx. Dja me kum nêkrêxmê pi'ôk kaprĩbit prãmukumrêx. Dja me amiraxbito amra. Dja me ôkre kadjwÿnhbê amim, —Ba ne ba imexmê iraxo me akrenh mex ne, ane. Dja me ar me ùno ba. Dja me nãmê bãm kabên mar kêtukumrêx. Dja Metĩndjwÿnh kute memã mÿjja nhôrja kunĩ kubê kĩnh no kati. Dja me Metĩndjwÿnhbê amiptàr mex ne.

³Dja me kum aben kĩnh kêtukumrêx. Dja me ukaprĩ kêtukumrêx ne kum aben kurêkumrêx. Dja me aben kã mex jarê. Dja me amipnên ar ba kêt ne tu arĩk ar ba. Dja me àkrêkumrêx. Dja me kum mÿjja punubit kĩnh ne kam kum mÿjja mex kurêkumrêx.

⁴Dja me kurê djwÿnhmã ôbikwa kanga. Dja me amakkre kêt. Dja me arĩk ta amijã bēnjadjwÿr rēnh ar o ba. Dja me amidjwÿnhbit o kĩnh ne kum Metĩndjwÿnh kĩnh kêtukumrêx. ⁵Dja me 'êx ne mekôt Metĩndjwÿnhmã ngrero krĩ. Ajkwakambit ne kute Jeju mar. Nhyim bep kati, amikadjwÿnhbê kute amikam Jeju mar kêt ne kute uma mar kêtukumrêx. Ë, kwãrik wãnh me ja kôt amrãnh kêt ne rúm memã akre rax.

⁶⁻⁷Ë, me arĩk baja ne me kwÿ me nire'ÿr wangij ne atemã memã kabên jarê. Me nire ja ne me no kêt ne axwebit ma ne kum mÿjja punubit prãmukumrêx ne arĩk mÿjja punu jabej mrã. Te kute mÿjja marmã ne Metĩndjwÿnh katãt kabēnja mar kêtukumrêx. Be, me nire punu jamã ne me atemã kabên jarê nhyim me prïne me kabên man kôt ar amijo ba.

⁸Me ja, me kute Metĩndjwÿnh kupa'ã memã 'ã ujarēnhja ne me kute mÿjja punubit mar. Djãm me kute amim Jeju mar got. Arkati, nãm me kum Metĩndjwÿnh katãt kabēnja kurêkumrêx ne kam me kute Môjdjê kurê djwÿnh pyrãk. Me kute me bakukãmãrebê Môjdjê kurê djwÿnh ja pyrãk. Ar idjibê ne Djanimê Djãmbri ar. Ar tãm ne ar kabēno Môjdjê japanho ba. Nhyim me kute Metĩndjwÿnh kupa'ã memã 'ã ujarēnhjadjwÿ ã kabēno Metĩndjwÿnh kabên katãtja japanho ane, ne Metĩndjwÿnh kabēno mÿjja kajgo ar o ba.

⁹Bep kati, dja me punuja amijo mrãnh 'ijabjê kêt nhyim me memã apôx, me axwemê me bibãnhmê me arĩk bajamã apôx. Me kute Djanimê Djãmbri arkum katorja pyrãk. Dja ã me memã apôxo ane nhyim me kunĩ me axwe kôt me omũ.

Metĩndjwÿnh kabên jarēnh'ã ukanga kêt mã kute arēnh.

¹⁰Nhyim bep ga ne ga arÿm iman ikôt ar amijo aba. Ije memã Metĩndjwÿnh kabēno amirĩt ne ije kôt ar amijo iba ne ije Metĩndjwÿnh amiptàr kadjy idjãpēnh o ije amirĩt ga arÿm kôt prïne ipumũn arÿm prïne idjãtãri. Ije

amikajmãtã Jeju mar ne 'ã ingrà tỳx ne akrànmã ije meo iba ne imã me abê ne ije Jeju 'ãno idjãm ne ije kanga kêt ga arỳm kôt ipumũ. ¹¹Me kute ijo bikênh ga ga arỳm itokrykôt ipumũ. Krĩraxbê Āxikimẽ krĩrax 'õbê Ikônimẽ krĩrax 'õbê Rixamẽ kam me kute ijo bikênhkôt ga arỳm ga ipumũ. Nãm me prĩne ijo ajkẽ ba itokry: ne. Nhyim bep Bẽnjadjwỳr Jeju ne mỳjja kunĩbê ipytã.

¹²Bir be, mrãmri ne me kute Kritu Jejukôt amijo ban katàt mrãnh prãmja mrãmri dja me kàtãm arỳm me jao ajkẽ.

¹³Ê, me axwemẽ me 'êxnhĩmẽ gêdja me ĩ punu raxo mõi purokam ĩ punu rax mex ne. Dja me memã 'êx ne me noo akno nhyim me kam amipãnh me jamã 'êx ne me noo biknor mex ne.

¹⁴Nhyim bep ga. Ga dja ga mã kôt amijo aba. Ar ije amã Metĩndjwỳnh kabên jarênh ga arỳm ga prĩne aje amim mar dja ga arek 'ãno djan kôt ar amijo aba. Ar ba ar ije amã arênhja ga arỳm ar ipumũ. ¹⁵Aprĩrekam ga arỳm Metĩndjwỳnh kabên maro tẽ. Maro tẽn o atẽn rã'ãn arỳm ajabatãnh ne arỳm prĩne ama. Metĩndjwỳnh kabên mexkumrêx kute ano bôngh ga arỳm aje tu amikajmãtã Kritu Jeju markumrêx nhyim arỳm kute apytãrja tãm ne ga arỳm prĩne o tẽn arỳm prĩne ama.

¹⁶Be, Metĩndjwỳnh ne me bakukãmãremã arê nhyim me kabên'a pi'ók no'ók ne, kôt pi'ók no'ók ne. Pi'ók no'ókja kunĩ ne kubê me banhõ Metĩndjwỳnh kabênja. Mỳj kadjy ne Metĩndjwỳnh kabênja? Bir, kute katàt memã Metĩndjwỳnh kukràdjã jarênh kadjy, kute me axwe nêje me akre kadjy, kôt me kute amũ aminhijuk'ã amidjar kadjy, kute katàt me krã pymjỳr nhyim me kute katàt mrãnhõ amũ amikamênho mõi kadjy. Be, kadjy ne Metĩndjwỳnh kabênja. ¹⁷Nã, Metĩndjwỳnh ta kabêno dja prĩne õ àpênho tỳx ne, prĩne o mex gê me kum apỳnh mỳjja mex djãribit kĩnh ne ar o ba. Be, dja ã Metĩndjwỳnh Kabêno meo ane.

4 ¹Ê, Kritu Jeju dja akubyn me bawỳr bõx ne ar me bajo ba, umao ar me bajo ba. Dja bõx ne me kunĩ jaxwekam memã pãnh jarê, me tĩnmẽ me tykmẽ me axwekam memã pãnh jarê. Kam ne ba Jeju Kritu kabênkôt, Metĩndjwỳnh kabênkôt amã ikabên jarê. Ne amã,

—Ê, gora memã Metĩndjwỳnh kabên jarê. ²Gora prĩne memã Metĩndjwỳnh kabên kôt kày bê memã arê gê me kuma. Gora 'ãno dja. Dja me kute mar prãm jabej ga memã arê. Nhyim bep djãm me kute mar prãm kêt jabej ga kam ga mã akubyn mekmã arê.

Gora Metĩndjwỳnh kabêno me ngrêk. Dja me'õ kute Metĩndjwỳnh mar kêt jabej ga kum Metĩndjwỳnh kabên jarê gê Metĩndjwỳnh kute katàt kabên jadjwỳrkôt amim kuman 'ỳr amijo akêx.

Gora me axwe nêje me akre. Dja me axwe jabej ga memã akabên 'õ jarê gê me axwe kêt.

Gora memã tỳx jadjã. Dja me'õ kute Jeju mar rerek jabej ga kum tỳx jadjã gê 'ã ngrã tỳx.

Dja ga ã me 'ãno adjãmõ anen kanga kêt mex ne akrànmã memã Metĩndjwỳnh kabên'ã ajarê.

³Dja ã me kute memã mỳjja kupa'ã arẽnh djwỳnhh bõx ne kam Metĩndjwỳnhh kupa'ã ar memã arẽnh ba. Nhym mã me mỳjja punu mar prãm ne. Nhym te Jeju nhõ me jao ba djwỳnhh te katàt memã arẽ nhym me mar prãm kêt-kumrẽx ne. Ne kam me kute kupa'ã memã arẽnh ba jabit ma ne amim me punubito atom nhym me kumex ne kam atemã memã kabẽn punu jarẽ. Me kute me kabẽn punu mar prãm kam ne me me kabẽn punubito ma. ⁴Nãm me Metĩndjwỳnhh kute katàt kabẽn jarẽnhja mar prãm kêt-kumrẽx ne jãm kubẽ krã. Ne kam me tũmre'ã ujarẽnh kajgobit mar prãm ne.

⁵Nhym bep ga. Ga dja ga mỳjja kunĩkam ano tỳx ne katàt o tẽ. Djãm me te ajo ajkẽ ga tu ate akrãn ar amijo aba rã'ãn mã kam amirĩt ne. Gora adjapẽnh 'ãno dja. Mỳj adjapẽnh gẽdja ga 'ãno dja? Ije kum me kute Jeju mar kêtjamã kukrãdjã ny'ã adjujarẽnh gẽdja ga 'ãno dja. Dja ga mã kam apẽ, prĩne memã Metĩndjwỳnhh kabẽno amirĩt ne katàt memã mỳjja jarẽnh mexkumrẽx.

⁶Ê, arỳm me kute ibĩn 'ỳr. Arỳm itẽm 'ỳr. Arỳm ne itẽm djã ijo rãm ne jao tẽ. Ityk'ã, me kute ijo Metĩndjwỳnhh nhõ mry ne ibĩn ba ityk'ã ne ba arỳm itẽm 'ỳr jarẽ. Arỳm ne ba amikam kô krãn mexo tẽn kam amã itẽm djã jarẽ. Arỳm ne ityk djã ijo rãm ne jao tẽ.

⁷Nã bãm Jejumã idjapẽnh mrãmri ne me kute me prõt tỳxmã mỳjja janhõr nhym me kumrẽx 'ỳr mrãnh ne bõx ne kute amỳnhja pyrãk. Nã bãm ã amikam itỳxo anen Jejumã idjapẽnhkôt ajbit ma. Nã bãm ã Jejumã idjapẽnh anen kam arỳm o ino rer djã'ỳr arỳm ibõx tẽ. Nã bãm ã 'itỳx anen amijo tẽn aminhinomã amimẽn arỳm itẽmmã. Nã bãm ije Jeju kanga kêt ne katàt memã mỳjja jarẽn arỳm itẽmmã.

⁸Nhym kam Bẽnjadwỳr Jeju kute katàt memã o pãnh djwỳnhhja tãm dja imã o pãnh. Dja katàt imã o pãnh mextire. Arỳm ne ikutẽp kudji. Dja imã, —Akmere, amrẽ tẽn amim aby. Ba arỳm amã ajaxwe kêt jarẽ ga arỳm imã amexkumrẽx. Ne kam on amim aby, ane. Kute memã o pãnh nhõ akatikam dja imã kungã. Djãm bajbit dja imã kungã? Kati, me kute kam amakja, me kum kĩnhja kunĩmã gẽdja kungã, me kunĩmã o pãnh ne.

Kurẽ djwỳnhh amiwỳr o bõx nhym ate kuka kõnh dja.

⁹Akmere, gora amrẽ amibẽx ne on iwỳr bõx. ¹⁰Nhym Demaj. Demaj ne kum me kàtãm kukrãdjã punujabit kĩnh, me kute Metĩndjwỳnhh kurẽ djwỳnhh kukrãdjã punu jabit ne kum kĩnh ne ar o ban arỳm ikangan imã iren mã tẽ, pykabẽ Texarõnika'ỳr tẽ. Nhym Krexẽxi arỳm pykabẽ Garaxa'ỳr tẽ. Nhym Xitu pykabẽ Damaxa'ỳr tẽ. ¹¹Rukabit ne ikuri dja. Maku dja ga aprõn amrẽ iwỳr o tẽ. Nãm ikôt apẽnh mexkumrẽx. Tãm gẽdja ga amrẽ o tẽ. ¹²Xikiku ne ba pykabẽ Epexu'ỳr ano.

¹³Ê, iwỳr atẽmkam dja ga amrẽ imã inhinõkã rytiwão tẽ. Wãnh ne ba gu bakamybẽ Kapukam kum inhire, krĩraxbẽ Krõwadjikam ne ba kum inhire. Gora amrẽ imã o tẽ. Pi'òk no'òk ngriwãmẽ no'òk raxwãmẽ amrẽ imã o tẽ. Pi'òk no'òktiwiã ne ba imã kĩnhĩ. Gora aman amrẽ imã abyn o tẽ.



(Atãri Ximoxi 4.13)

ijaxwe jabej ikukjêro nhỹ. Nhym nhỹnh ne inhõbikwa 'õ ikuri dja? Kati, nãm ar kunĩ ikangan mã prõt ne, mã ipymaje prõt ne. Gora gê inhõbikwa ipymaje prõtwa gora gê Metindjwýnh arkum o pãnh kêt ne arkam ujakrãnh no kati, arkam ukapri.

¹⁷Nã, me ne me ipymaje prõt ne. Nhym bep kati, Bẽnjadjwýr ne ikõt djan imã tỹx jadja ba tu kanãrrãm kãj bẽ memã Metindjwýnh jarẽ, prĩne kunĩ'ã ajarẽ nhym me bajtem kunĩ arỹm kuma. Djãm me kute ikukjêrkam uma ngri got. Nãm me kubẽ rop prãbẽ uma:kumrẽx. Nhym bep Metindjwýnhbit ne mebẽ ipytã.

¹⁸Nhỹnh ne mỹjja punu 'õ ne kute ijo bikẽnhmã? Kati, Metindjwýnh ta gẽdja inẽje jãm mỹjja punu dji. Metindjwýnh ta ne kute ipytãr ta gẽdja ipytãn ijo tẽn õ pykakam ijo bõx, mõi djãmã ijo bõx ba kam kõt imexkumrẽx ne ar iba. Gora gê me kunĩ Metindjwýnhmã kãjmã rax jarẽ. Me kunĩ dja me kãjmã kum rax jarẽho tẽ. O tẽn rã'ã rã'ã rã'ã ne. Gora gê me mrãmri o anhỹro tẽ.

¹⁹Dja ga Prixiramẽ Akwire arkum ijarẽ, ne ajte Nexipõrmẽ prõmẽ kramẽ arkum ijarẽ, ar kupãnhĩa arkum ijarẽ. ²⁰Ë, Eraxu ne krĩraxbẽ Kõritukam arek dja. Nhym Krõpimu kanẽ, pykabẽ Miretukam kanẽ ba kam kum inhiren amrẽ tẽ.

Amrẽ amibẽx ne na tỹm djwýnhràam iwýr bõx.

²¹Juburmẽ Prudẽximẽ Rinumẽ Kraõdjamẽ me kute Jejukõt abeno kamy kunĩ ne me wãm amã amijarẽ. ²²Gẽ Bẽnjadjwýr Jeju prĩne ajo ba nhym Metindjwýnhdjwý ukapriãkõt prĩne me akunĩõ djuw mex. Tã ne ja.

¹⁴Ë, Arexãri kute ngõnh nhipẽx djwýnhja ne prĩne ijo ajkẽ. Metindjwýnh ta dja kum axweo pãnh. ¹⁵Gadjwý dja ga aminẽje tãwã pumũ. Nãm kabẽno ar ijapa ne. Nãm kabẽno ar ijapa: ba te kum ikabẽn mex jarẽ ne te akre nhym mã kabẽno ar iJapan kam prĩne kabẽno ijo ajkẽ. Kam ne ba amã, —Gora aminẽje tãwã pumũ, ane. Kam ne ba amã ane.

¹⁶Me kute amiwýr ijo bõx kutewakam nhỹnh ne inhõbikwa 'õ ikuri dja? Me kute amiwýr ijo bõx ne we ijaxwe jabej ikukjêro ýr kutewakam? Ba we ijaxweo ije amiptãr kadjy nãrãm me kute bit ibĩnmã amiwýr ijo bõx ne we